


MOSTOVI



DECEMBAR/PROSINAC 2023.

Dragi Čitaoci,

Pred vama je novi decembarski broj školskog lista „Mostovi“.

Školski list „Mostovi“ započinjemo novostima iz škole; raznim projektima, posjetama,... Saznat ćete razne zanimljivosti iz naše škole. Pored ovoga, naravno, pratili smo i sve redovne školske i vanškolske aktivnosti, istraživali. Izdvojili smo nagrađene radove učenika naše škole povodom Mjeseca knjige i Dana državnosti BiH.

Zabilježili smo posjete našoj školi i o tome zabilježili kratku reportažu. Također, i dalje pišemo u rubrici „Iz učeničkog pera“.

Nadamo se da će stranice ovog broja „Mostova“ pružiti zadovoljstvo i Vama i nama.

Čitajte i uživajte!

Redakcija Literarno-novinarske sekcije

Javna ustanova Osnovna Škola „Suljo Čilić“ Jablanica

Ulica Komune Vejle br.28

88 420 Jablanica

www.suljocilic.com.ba

[mail:os.cilic@bih.net.ba](mailto:os.cilic@bih.net.ba)

tel/fax: 036 752-801

SADRŽAJ:

<i>-Uvod</i>	<i>2</i>
<i>-Sadržaj</i>	<i>3</i>
<i>-Novosti iz škole</i>	<i>4</i>
<i>-Posjete</i>	<i>8</i>
<i>-Obilježili smo...</i>	<i>9</i>
<i>- Dan učitelja</i>	<i>9</i>
<i>- Mjesec knjige</i>	<i>10</i>
<i>- 25. Novembar - Dan državnosti BiH</i>	<i>16</i>
<i>-Sekcije u našoj školi</i>	<i>20</i>
<i>-Iz učeničkog pera</i>	<i>22</i>
<i>-Zabavni kutak</i>	<i>23</i>
<i>-Dan Dječije radosti</i>	<i>24</i>
<i>-Preporuka za čitanje</i>	<i>26</i>
<i>- Kako provesti zimski raspust?</i>	<i>27</i>
<i>-Novogodišnja čestitka</i>	<i>28</i>
<i>-Redakcija</i>	<i>28</i>

NOVOSTI IZ ŠKOLE ...

U fiskulturnoj sali naše škole, 1.septembra 2023.godine, upriličen je prijem za đake prvake. Tom prilikom podijeljeni su udžbenici za učenike prvih razreda. Učenicima i njihovim roditeljima riječima dobrodošlice obratili su se predsjedavajući Općinskog vijeća Emir Muratović, direktor škole Edin Idrizović, te učiteljice I₁ Amela Nezirić, I₂ Amnela Begović i I₃ Hajrija Zahirović. I ove godine za učenike od prvog do devetog razreda obezbijeđeni su besplatni udžbenici (novi udžbenici i udžbenici nabavljeni prošle školske godine), za koje je sredstva obezbijedila Vlada HNK-a. Podjela udžbenika za učenike od drugog do devetog razreda, upriličena je 4. septembra - prvog dana nastave u školskoj 2023/24.godini.



Sretan početak nove školske godine!

Manifestacija „Dani muzeja „

U povodu obilježavanja manifestacije “Dani muzeja”, rukovodstvo muzeja „Bitka za ranjenike na Neretvi“ organizovalo je književnu promociju i lutkarski performans za naše najmlađe učenike - prvačiće. Gost je bila književnica i učiteljica Elmira Helać - Mekić koja je djeci predstavila svoja djela i učitelj i lutkar Sabit Agić koji je pored lutkarskog performansa uz gitaru i pjesmu zabavio naše mališane.



Međunarodni izazov za popularizaciju Informatike

DABAR INFORMATIČAR 2023.

Naši učenici od šestog do devetog razreda i ove godine imaju priliku da učestvuju u izazovu “Dabar – informatičar”, koji im pruža priliku za novi susret sa informatikom kao naučnom disciplinom koja im pomaže da upoznaju sebe, svoje skrivene talente i mogućnosti. U cilju promocije informatike kao savremene nauke organizovano je takmičenje u periodu od 6. do 17. novembra. Aktivnosti vodi nastavnik Adis Pirija koji je ujedno i koordinator ovog takmičenja.



Dabar
Informatičar

Upoznajmo zavičaj...

U okviru učenja i podučavanja gradiva u četvrtom razredu planirano je upoznavanje zavičaja naše domovine Bosne i Hercegovine. Učenici IV razreda naše škole, uključujući i učenike iz područnih škola, 20.septembra 2023.godine posjetili su Mostar. Do Mostara su putovali vozom, što je za njih predstavljalo jedno novo iskustvo i nezaboravan doživljaj. U Mostaru su posjetili Narodno pozorište kom prilikom im je dramaturginja Emina Kovačević održala edukativni čas i organizovala obilazak pozorišta. U sklopu posjete prisustvovali su izvođenju predstave „Zlatokosa“ u Pozorištu lutaka, te obišli Muzej Hercegovine i Stari most.





U Muzeju „Bitka za ranjenike na Neretvi“, 30.oktobra 2023.godine održana je interaktivna predstava i dječiji koncert „Latif & Mravko“ u izvedbi dječijeg pjevača Moćević Latifa. Koncert je obilovao edukativnim pjesmama koje govore o ljubavi, zahvalnosti, pažnji, prijateljstvu, a u svemu tome su uživali učenici naše škole od prvog do petog razreda. Osmijesi i sreća na njihovim licama najbolja su potvrda uspjeha koncerta. Pokrovitelj koncerta je Institut Yunus Emre u saradnji sa OŠ“Suljo Čilić“ Jablanica.



Dana, 1.novembra 2023. godine povodom obilježavanja Svjetskog dana štednje (31.10.) učenici VIII1 razreda u pratnji nastavnika Tufek Izudina posjetili su Privrednu banku Sarajevo-poslovnica Jablanica. Kroz ugodan razgovor i druženje, uposlenici su ih upoznali sa značajem štednje kom prilikom su im uručili prigodne poklone.

POSJETE...

Saradnja sa bratskom školom Hayriye Kayrakli iz Istanbula



Na poziv novoizabranog direktora bratske škole Hayriy Kayrakli iz Istanbula Redžep Akoč, u periodu od 12.10. do 16.10.2023. godine u posjeti školi boravili su direktor škole Edin Idrizović i nastavnik turskog jezika Muhamed Muminhodžić. Tokom posjete sumirani su rezultati dosadašnje saradnje te izraženo opredjeljenje za nastavkom dugogodišnje uspješne saradnje dviju škola.



Direktori bratskih škola prisustvovali su i sastanku sa ministrom obrazovanja Badžilara Mustafom Yilmazom, na kojem je data puna podrška nastavku saradnje od strane Ministarstva. Osim toga, održan je sastanak sa bivšim direktorom škole Bayramom Četinom, sa kojim je saradnja i započeta, a koji je sada na funkciji direktora druge osnovne škole u Općini Badžilar.



U sklopu aktivnosti planiranih programom saradnje, u periodu od 8.11. do 12.11. 2023. godine u našoj školi boravilo je 12 učenika, tri nastavnika i direktor škole Hayriye Kayrakli iz Istanbula. Tokom boravka, 11.11.2023. naša škola potpisala je novi Protokol o bratimljenju škola sa školom Hayriye Kayrakli iz Istanbula, koji je podržan od Ministarstva obrazovanja Republike Turkiye.



Protokol su potpisali direktor JU Osnovna škola “Suljo Čilić” Jablanica Edin Idrizović i direktor škole Hayriye Kayrakli Istanbul Redžep Akoč u prisustvu visoke delegacije : **Ömer Faruk Yelkenci** – zamjenik ministra za obrazovanje Turkiye; **Tuba Korkmaz** – direktorica odjela za EU poslove i vanjske poslove pri ministarstvu; **Dr. Murat Müdžahit Yentur** – direktor direkcije za obrazovanje Okruga Istanbul; **Šeref Ateš** – predsjednik Instituta Yunus Emre; **Mehmet Akif Yaman** - direktor Instituta Yunus Emre

Sarajevo; **Mustafa Yilmaz** – ministar obrazovanja Badžilara i **Damir Šabanović** - načelnik Općine Jablanica.

Potpisivanjem novog Protokola, pored dosadašnjih aktivnosti (međusobne edukativne i kulturne posjeta učenika i nastavnika, razmjena dobrih praksi u oblasti obrazovanja, kao i uspostavljanje komunikacijske mreže između učenika i nastavnika), otvaraju se mnoge mogućnosti zajedničkog apliciranja škola na domaće i inostrane projekte.



Obilježili smo ...

DAN UČITELJA

UNESCO je proglasio 5.oktobar Svjetskim danom učitelja. Uloga nastavnika u školi je od velikog značaja. Svaki nastavnik svojim pristupom i radom može doprinijeti poboljšanju, kako svoga rada s

učenicima tako i svog utjecaja na okolinu u kojoj djeluje. Uposlenici naše Škole ovaj važan datum obilježili su jednodnevnim izletom u Travnik.

Sretan Dan učitelja – 5. oktobar!

OKTOBAR - MJESEC KNJIGE



Oktober se obilježava kao mjesec knjige s ciljem promovisanja knjige i promicanja svijesti o važnosti čitanja. Tokom oktobra u našoj školi provedene su brojne aktivnosti obilježavanja Mjeseca knjige.

Između ostalog, izdvajamo pisanje literarnih radova za sve učenike od VI do IX razreda na temu: „U knjigama je sva mudrost svijeta“ sa sljedećim rezultatima: 1. mjesto – Zina Ivković VIII₃ , 2. mjesto – Ahmed Zahirović VIII₃ , a 3.mjesto podijelili su učenici VI₁ – Nađa Imamović i Vedad Tašić.

1. mjesto

U knjigama je sva mudrost svijeta

Još od malih nogu, bila sam vrlo zainteresovana za knjige. Posmatrala sam starijeg brata dok čita i zamišljala koja se to čarolija krije između tih korica. Sjećam se da sam bila vrlo znatiželjno dijete i uvijek sam tražila od brata, nene ili roditelja da mi pročitaju neku slikovnicu. To je uglavnom bila knjiga čije su mi korice bile zanimljive. Po pričama mog starijeg brata, još otkako je on počeo učiti prve lekcije u vrtiću ili školi, ja sam zahtijevala da mi pročita ono što me je zanimalo. Kaže da sam nekada bila vrlo dosadna. Često mi je čitao lekciju iz "Prirode i društva", novu pjesmicu iz njegove Čitanke ili sam pogađala riječi iz stranog jezika.

Zahvaljujući njemu, ja sam još više razvila želju da naučim čitati, i da pročitam sve te "čarolije" skrivene iza šarenih, novih i uglancanih ili mističnih vremenom istrošenih korica, ali osoba koja me je zapravo uvela u taj svijet mudrosti, i naučila me čitati, čak i prije

nego što sam pošla u školu, bila je moja nena, majka Nera. Sa njom sam provodila sate učeći čitati mala i velika, štampana i pisana slova, a kasnije i pisati.

Prije nego što sam krenula u prvi razred sama sam čitala omiljene bajke. Iskreno, beskrajno sam joj zahvalna i ponosna, jer sam tako mala počela uživati u svijetu knjiga. A danas, iako imam puno drugara i roditelje sa kojima mogu da razgovaram o sebi i onome što me zanima, volim pročitati knjigu jer svaka riječ na njenim stranicama ima posebnu snagu i moć da mi pomogne u raznim trenucima. Knjiga zaista može biti savjetnik, prijatelj i naravno učiteljica.

Šta bismo radili da nemamo knjige? Kako bismo učili? Pa nije moguće stoljećima pamtit i mudre riječi koje je neko rekao, teorije koje je neko shvatio, i zakone koje je neko postavio. Sve je to potrebno zapamiti da ne bi došlo do zaborava. Zaborav, zanimljiva riječ, zar ne? Zar riječ od sedam slova može imati takvu moć? Ljudi tako "brzo" žive da zaboravljaju ono što je važno. Nisu ni svjesni koliko moć zapravo ima riječ od sedam slova.

Danas, svi misle da znaju sve i da su najmudriji. No, znate li ko ima titulu najmudrijih? To su, naravno, Knjige. One bivaju mučene nemilosrdnim kandžama vremenskih nepogoda i neobazrivosti ljudi, ali svejedno čuvaju svoje tajne stoljećima. Upravo zato im se toliko divim, i toliko uživam čitajući što je neko napisao, jer znam da se te rečenice, riječi i slova neće lako zaboraviti. Čuvaju ih knjige.

One, kao i ljudi imaju svoje osobine. Pored onih naučnih knjiga, udžbenika, enciklopedija i knjiga o znanosti, tu su i moje omiljene vrste knjiga-dječiji romani. Ja čitanje doživljavam kao vid opuštanja. Toliko se uživim u sadržaj nekog romana da totalno prestanem razmišljati o sadašnjosti, već odlutam u svijet romana. Iskreno, dosta puta sam i plakala uz knjigu, i dosta emocija se budilo. Smatram, da u sadašnjem "brzom" svijetu, i pored svih problema treba naći vid opuštanja i relaksacije. Vrijeme koje trebamo odvojiti za sebe, razmisliti smireno o svim problemima i naravno, o sebi. Moj vid opuštanja je čitanje.

Često sebe pronadem u nekom liku iz knjige, i njegovi postupci me nadahnjuju, i poslije razmišljam o njima. Smatram, da su knjige jedan veliki dar koji ne smijemo zaboraviti i trebamo njegovati. One će nam uvijek pomoći, jer u knjigama leži sva mudrost svijeta.

Zina Ivković VIII₃

Učenici Likovne sekcije, a kako drugačije, nego koristeći boje i kistove. Neki od njihovih radova:



POSJETA BIBLIOTECI SREDNJE ŠKOLE JABLANICA



Članovi Literarno – novinarske sekcije u pratnji svojih nastavnica posjetili su biblioteku Srednje škole u našem gradu, koja ima 6788 knjiga sa 1215 naslova. Tom prilikom, učenici naše škole su imali priliku družiti se sa srednjoškolcima sa kojima su razgovarali o načinu obrade lektire u srednjoj i u osnovnoj školi.



Srednjoškolci su ih upoznali sa sadržajem knjiga koje su na njih ostavile poseban dojam, te im dali preporuke za čitanje. Naši učenici prezentovali su na svoj način odabrano književno djelo, koje je dio obavezne lektire u osnovnoj školi.



Druženje sa srednjoškolcima je proteklo u prijatnoj i veseloj atmosferi.

Ovakvim susretima razvija se kultura čitanja i pokazuje nam, da bez obzira što živimo u svijetu ekrana i monitora, kada se lako zaboravlja užitek čitanja knjige, ipak, knjiga i dalje ostaje veliki čovjekov prijatelj.

KUTAK ZA MALU RAJU



Belma Jamaković, V r. PO Ravna



Anja Jurić, V r. PO Doljani




Abdulhadi Bišić, IV r. PO Ravna



Arman Potur, V r. PO Ravna



Emina Siharlić, IV r. PO Doljani



Lulić Amar, IV r. PO Doljani



Alina Kubić, II r. PO Doljani



Vedad Junuzović, II r. PO Doljani



Đani Lulić, V r. PO Doljani



Omar Kurić, III r. PO Slatina



Lejla Arfadžan, II r. PO Doljani




Merjem Hondo, IV r. PO Slatina



Ivan Grbešić, II r. PO Doljani



Ilhana Zukić, IV r. PO Doljani



Asja Zukić, II r. PO Doljani



Luka Perković, II r. PO Slatina



Harun Zahirović, III r. Doljani



Mila Antunović, III r. Slatina



Ilhana Zukić, IV r.PO Doljani



Mudre riječi male raje...

“Knjiga je najveće bogatstvo.” Dženan Letuka, V razred, PO Ravna”

“Svaka knjiga ima svoju priču i mudrost.” Ilhana Zukić, IV razred, PO Doljani

“Knjige treba čitati i čuvati.” Lamija Kubić, IV razred, PO Doljani

“Dobra knjiga je događaj u mom životu.” Kerim Mešić, II razred, PO Ravna

“Iz knjiga učimo o životu i prirodi koja nas okružuje” Sarah Keskin, II razred, PO Ravna

“Knjiga je potrebna svima.” Asja Mešić, II razred, PO Ravna

DAN DRŽAVNOSTI BOSNE I HERCEGOVINE – 25. NOVEMBAR

Jedan od najznačajnijih datuma u historiji naše zemlje je 25.novembar – Dan državnosti. Učenici naše škole, kao i prethodnih godina, obilježili su ovaj datum različitim aktivnostima.

Panoi učenika nižih razreda





Historijska sekcija

Literarno – novinarska sekcija

Članovi Likovne sekcije





Povodom Dana državnosti, učenici naše škole od VI do IX razreda, pisali su literarne radove na temu: „Da te volim duša zna, draga moja BiH „. Načelnik općine Damir Šabanović na Svečanoj akademiji koja je održana 25. novembra nagradio je učenike naše škole koji su na ovogodišnjem konkursu bili najuspješniji: Prvonagrađena Elena Davidovski, drugonagrađena Adna Nezirić, učenice IX4 razreda i trećenagrađeni Omar Begović, učenik VI2 razreda.

Prvonagrađeni rad:

Da te volim duša zna, draga moja BiH

Svaki novembar probudi u mojoj duši neki slatki nemir, sjećanje na djetinjstvo i prvi susret sa tobom, draga moja BiH. Sjećam se jednog novembarskog dana, moje igre u parku, sjećam se tvoga glasa i ispričane priče. U igri uzela sam kamen i upitala ga: “Ko si ti?” Neki, nježni glas je odgovorio: “To sam ja, tvoja domovina”. Bacila sam kamen i preplašeno otrčala niz park. Sjela sam na klupu i začula ponovo taj glas: “Ne boj se, to sam ja, tvoja domovina. Zovem se Bosna i Hercegovina. Ispričaj ću ti priču o sebi.”

Počela je pričati, a ja sam je zadivljeno slušala. Slušala sam kako je nastala u dalekoj prošlosti, ali se za njeno ime čulo tek Poveljom Kulina-bana. Pričala je o Osmanskom carstvu i Austro-Ugarskoj monarhiji. Prekinula sam je i upitala da li je onda ona princeza. Nasmijala se i rekla da ona nije nikakva



princeza, već zemlja, domovina u kojoj sam ja rođena. Ona je svaki kamenčić, cvijet, drvo, potok, rijeka, planina i ptica u mojoj rodnoj zemlji. Zbunjeno sam je gledala i nastavila slušati njenu čarobnu priču.

Od toga dana o svojoj “princezi” sve sam više saznavala. Saznala sam da su se mnoge zemlje otimala za parče njenog tla. Iako mnogo manja, mnogo slabija, hrabro se borila ne dajući ni milimetra svoga tla. Dugo je bila pod okriljem tuđe čizme i tuđih običaja. Napadali su je mnogi, a ona se ponosno branila, dizala iz pepela i ostajala nepobjediva stoljećima. Platila je visoku cijenu za to.

Mnogi njeni sinovi su hrabro koračali uz nju, pomagali joj da ostane jedinstvena i nepokorena. Dali su svoje živote i natopili njeno tlo svojom krvlju. I pored velike boli, patnje i tuge stajala je uspravno, prkosno podignute glave. Preživjela je tri ratne patnje svoga naroda i svaki put ponijela ožiljak na svome srcu. Imala je toliko hrabrosti i snage da izdrži bol koju je osjećala kada su joj djeca međusobno ratovala i topila njene majčinske skute svojom krvlju. Potpuno skrhana očajem i nevjericom, posljednjim atomom snage se ponovo digla i stala između zaraćenih sinova.

Opet je uspjela. Uspostavila je mir. Sa ranjenim srcem i tugom u duši pokušavala je pomiriti zaraćene sinove, učeći ih da oprostite, ali ne zaborave. Pokazala je svu svoju veličinu, posebnost i srce puno ljubavi za svu svoju djecu. Snaga moje drage Bosne i Hercegovine ne nalazi se samo u njenoj historijskoj prošlosti, već u njenoj velikoj duši i osjećanjima koje svima nama pokazuje. Pored unutrašnje ljepote koja je neprocjenljiva i vanjska ljepota moje drage BiH je posebna i očaravajuća.

Nigdje na svijetu nema tako lijepih zelenookih ljepotica kao što su Una i Neretva, nigdje nema visokih gorostasa kao što su Maglić i Prenj, nigdje nema Sarajeva, Jablanice, Mostara... Nigdje nema tolikog kulturno–historijskog i prirodnog bogatstva kao u mojoj domovini. Zemljo moja, najljepša si.

Draga moja BiH, svakoga dana sve više te volim. Svaka nova priča o tebi, čini me ponosnijom i budi novi slatki nemir u mojoj duši. Ne postoje riječi ovoga svijeta kojima bih mogla izreći svu svoju ljubav, zato “Da te volim, duša zna, draga moja BiH-a.”

Elena Davidovski IX₄

Sekcije u našoj školi

Pored redovne nastave učenici naše škole učestvuju i u radu velikog broja sekcija. U ovom broja *Mostova* predstavljamo vam neke od njih:

Kućna radinost - okuplja učenike od II do IX razreda. Bave se kreativnim radom. Izrađuju unikatne predmete koristeći različite materijale, restauriraju stari školski namještaj, prave makete stare bosanske kuće, predmete iz prošlosti, tradicionalne nošnje iz naših krajeva itd. U mjesecu decembru izrađuju ukrase za priredbu povodom Dana dječije radosti.



Likovna sekcija

U rad likovne sekcije uključeni su učenici od VI do IX razreda. U ovoj školskoj godini sekcija broji petnaest aktivnih članova, koji zajedno sa svojim nastavnikom žele da slikaju i crtaju pored redovnih časova likovne kulture. U toku školske godine prate značajnije datume, te biraju teme u skladu s tim, npr. Mjesec knjige, Dan državnosti, Dan dječije radosti... Njihovi radovi ukrašavaju hol naše škole.

Informatička sekcija

U savremenom društvu znanja, osim temeljnih obrazovnih područja kao što su matematika, maternji i strani jezik, uspjeh u današnjem vremenu zahtijeva i posljednju, ali ne manje važnu – informatičku pismenost. Osim na časovima informatike, učenici naše škole imaju mogućnost svakodnevno poboljšavati svoje digitalne kompetencije kroz informatičku sekciju. U rad informatičke sekcije uključeni su učenici od VI do IX razreda. U ovoj školskoj godini u rad sekcije aktivno je uključeno sedamnaest učenika. Sekcija se održava jednom sedmično.

Na sekciji, između ostalog, učenici rade sa LEGO kompletima, Arduino opremom, i sa micro bitom. Učenici šestih i sedmih razreda najviše vole da rade sa micro bitom jer je najlakše za programirati, dok učenici osmih i devetih razreda programiraju sa Arduino setovima koji se mogu programirati u vizuelnim jezicima uz upotrebu blokovima, ali i u C programskim jezicima.

Cilj je da učenici nakon savladanog znanja o korištenju programskih jezika sami osmisle i programiraju neke svoje projekte. Iako trenutno nema nekih takmičenja, članovi sekcije zajedno sa svojim nastavnikom, nadaju se skoroj smotri projekata i radova u organizaciji IT girls. U projekat IT girls naši učenici su uključeni već nekoliko godina i od njih su dobili mnogo potrebne opreme za rad.

Cilj projekta je uključiti što više djevojčica u programiranje i izradu projekata, jer je nažalost, broj djevojaka u STEM području mnogo manji od broja momaka. Što se tiče opreme, svaki učenik ima svoj računar za rad na času, nekoliko lego kompleta kao i Arduino opreme, oko dvadesetak micro bitova sa proširenjima i dodacima, jedan hexabot, 18 mbot robota, i dr.

Informatička sekcija učenicima pruža odličnu priliku za razvijanje logičkog i kritičkog razmišljanja, timskog rada i socijalizacije, što su jako važne vještine. Osim toga kroz razna takmičenja i smotre imali su priliku promovisati našu školu i dokazati koliko su učenici naše škole vrijedni i uporni, a uz to sve učenicima se pruža jedno veliko i vrijedno iskustvo da uče kroz praktičan rad.



Iz učeničkog pera...



OPROSTI GITARO

Oprosti mi gitaro što
ja tvoje žice diram.
Hoću sada zadnju pjesmu,
nevjernici da odsviram.

Sreli smo se jednog dana,
dok su cvale divne ruže.
U zagrljaju šapućeš mi,
bit ću tvoja vjerni družo.

JEZIK MOJ, BOSANSKI

U mom srcu klija pjesma,
u mom duhu titra zvuk.
Sve su riječi njemu podređene,
sve je drugo samo muk.

To je moj maternji jezik,
sa njim dišem sa njim živim,
Bez njega ne bih bio ja,
to moje srce samo zna.



Ali jedne divne noći,
zasjale su njene oči.
Proplakale, prošaptale,
da rastanak mora doći.

Proklet bio svako onaj,
ko u tuđu ljubav dira.
Ne imao nikad spokoj,
ne imala mu duša mira.


Adin Selimović IX²

Moja riječ je moje oružje,
moja snaga u njemu je.
Moj život moj san,
Svojim maternjim jezikom sam
presretan.


Adin Selimović VIII²

ZABAVNI KUTAK

Koji broj treba stajati umjestu upitnika ?



$$\begin{aligned} \text{Red flower} + \text{Red flower} + \text{Red flower} &= 60 \\ \text{Red flower} + \text{Blue flower} + \text{Blue flower} &= 30 \\ \text{Blue flower} - \text{Yellow flower} &= 3 \\ \text{Yellow flower} + \text{Red flower} \times \text{Blue flower} &= ? \end{aligned}$$



DAN DJEČIJE RADOSTI

U našoj školi je 29.12.2023.godine organizovana priredbu povodom Dana dječije radosti. Kroz igru, pjesmu, recitacije i smijeh ispraćena je 2023. godina. Učesnici su bili učenici nižih i viših razreda i korisnici usluga produženog boravka. Priredba je upriličena u školskoj fiskulturnoj sali koja je bila ispunjena do posljednjeg mjesta.

Učenici su za ovu priliku sa svojim nastavnicima pripremili prelijep program. Publika, koju su sačinjavali učenici, roditelji i gosti, je uživala, i svaku izvedbu nagradila gromoglasnim aplauzom. Učesnici programa su kroz igru, svirku, recitacije i horsku izvedbu oduševili sve prisutne.



Prije početka programa naši voditelji su svim prisutnima poželjeli dobrodošlicu. Prvi su nastupili naši najmlađi učenici sa recitacijama i igrokazom.

Ako ne čuješ, ručice naše pomažu, naše ruke tebi govore, najljepše priče pričaju, ljubav i radost pružaju, poručili su, također učenici nižih razreda izvodeći plesnu tačku na znakovnom jeziku.



Program su nastavili učenici viših razreda kroz pjesmu, igru i smijeh. Posljednja tačka je bila izvedba članova FA "Neretva" koji su izvedbom tradicionalnih igara završili program. Naši učenici su i ovaj put pokazali svoja pjevačka, glumačka, recitatorska i plesачka umijeća, za što su bili nagrađeni gromoglasnim aplauzom svih prisutnih.



Želimo se zahvaliti svima koji su svojim prisustvom uveličali ovaj divan dan i poželjeti im sve najbolje u sljedećoj 2024. godini, kao i svakoj narednoj.

Preporuka za čitanje



ROMAN O VJERNOM PSU

Lesi se vraća kući bez sumnje je jedna od najomiljenijih dječijih knjiga koje su se pojavile do današnjeg dana. Od vremena kada je napisana, one za tebe već davne 1940. godine, pa do danas objavljena je na engleskom jeziku i u prevodu na brojne druge jezike svijeta toliko mnogo puta da je tačni broj izdanja gotovo i nemoguće ustanoviti.

Taj podatak govori nam o ogromnoj popularnosti koju dirljiva priča o vjernom psu Lesi uživa među mladim čitaocima, a kojima je prvenstveno i namijenjena. Zbog toga je ona uvrštena i lektiru sa željom da zabavi i poduči.

Možda vam je poznato da je po ovoj knjizi snimljen svojevremeno i igrani film, koji su sa oduševljenjem gledali

milioni djece i odraslih širom svijeta, a ime Lesi postalo je pravi sinonim za pasminu škotskog ovčara, poznatog još i kao "koli" (collie, colly).

To je vrijedno, inteligentno i veoma lijepo pseto dugačke njuške, svilenkaste bijele, zlatnožute i crne dlake i dostojanstvenog držanja i hoda. Sigurno ste ponekog škotskog ovčara već vidjeli i na ulicama gradova u kojima živite ili koje ste posjetili. Kad ga ponovo vidite, sjetite se Džooove vjerne Lesi, čija se uzbudljiva životna priča nalazi sada pred vama!

Erik Najt (Eric Knight), autor ovog djela, rođen je i djetinjstvo je proveo u Jorkširu, u sjevernoj pokrajini Engleske u kojoj počinje i završava priča o Lesi.

U ovom "turobnom dijelu sjeverne Engleske", kako ga naziva pisac, klima je oštra i veoma često snažni vjetrovi, praćeni hladnim kišama, brišu preko močvarnih visoravni koje su tipične za ovaj dio Engleske. No takva surova klima čeliči ljude i čini ih otpornim i borbenim.

Takvi su i njihovi psi koje u tom kraju svi vole, kako zbog njihovog izgleda, tako i zbog odanosti čovjeku i spremnosti da mu pomognu u svakoj situaciji.

Lesi je upravo takvo jedno pseto, no, osim toga, ona je, prema mišljenju svih stanovnika Grinal Bridža, najljepša i najpametnija, a njena savršena tačnost postala je legendarna. Svoga maloga gospodara Džoa sačekivala je Lesi svakog radnog dana pred školom i pratila ga je do kuće pune četiri godine, no tada, jednog dana, desilo se nešto posve neočekivano što je Džoa veoma uznemirilo – Lesi se nije pojavila pred seoskom školom!

Uznemirenost se pretvorila u pravo očajanje kada je saznao da je njegov otac, pritisnut teškom neimaštinom, prodao lijepo pseto da bi prehranio porodicu. No sa takvim rješenjem nisu se htjeli pomiriti ni dječak ni njegovo vjerno pseto!

Tu započinje tvrdoglava bitka za slobodu, bitka u kojoj vjernost, upornost, požrtvovanost i ljubav pobjeđuje sve prepreke, da bi na kraju opet sve bilo kao i nekada. Iscrpljena i gotovo mrtva Lesi se vraća kući – u snažni, sretni zagrljaj njenog Džoa, od kojega se više neće odvajati. – Ti si moje vjerno pseto, moja vjerna čuvarkuća! – šapuće joj razdragano Džo na samom kraju knjige. Požurite sa čitanjem, da se njihovom beskrajnom veselju i vi pridružite!

Kako provesti zimski raspust?

- ❖ UKOLIKO BUDE SNIJEGA, UŽIVAJTE U SNJEŽNIM ČAROLIJAMA
- ❖ POSJETITE PLANINU, SELO ILI OKOLNU PRIRODU U SVOM MJESTU
- ❖ PROVODITE VRIJEME SA PORODICOM I DRUGARIMA
- ❖ POSJETITE BIBLIOTEKU I ODABERITE KNJIGE
- ❖ PRIČAJTE PRIČE SA PORODICOM I DRUGARIMA
- ❖ POSJETITE BIOSKOP ILI POZORIŠTE
- ❖ IGRAJTE DRUŠTVENE IGRE ILI SLAŽITE PUZZLE
- ❖ BUDITE KREATIVNI – STVARAJTE MALA UMJETNIČKA DJELA
- ❖ NAUČITE DA SVIRATE NEKI INSTRUMENT ILI UŽIVAJTE U MUZICI
- ❖ UPOZNAJTE SE SA NOVIM SPORTOVIMA
- ❖ UŽIVAJTE U ZIMSKOM VOĆU I POVRĆU
- ❖ IGRAJTE EDUKATIVNE VIDEO-IGRE

- ❖ NE ZABORAVITE DA OSTANETE U FORMI ZA NAREDNO POLUGODIŠTE

Ukoliko ste od učitelja ili nastavnika dobili zadatke koje treba da uradite tokom raspusta, izdvojite određeno vrijeme u toku dana koje ćete posvetiti njihovom rješavanju. Čak i ukoliko niste dobili šta da radite, potrudite se da ostanete u formi za učenje:

- pročitajte knjigu iz lektire, riješite pokoji domaći zadatak ili jednostavno sumirajte šta ste sve postigli tokom prethodnog polugodišta, gde ste bili slabiji i napravite plan kako da u narednom polugodištu budete još bolji.

Ovo su samo neki od prijedloga kako da ispunite zimske dane kvalitetnim sadržajem, koji će vas istovremeno zabaviti i pomoći vam da ostanete u formi za novo polugodište.

Želimo vam najljepši zimski raspust do sada!



*Nova godina neka vam donese smijeh. Sreća i ljubav neka budu vaš
uspjeh. Neka vam stvarnost bude osičenje najljepšeg sna, i neka vas
svako jutro obasja sreća sva.*

Sretna Nova 2024. godina

RUKOVOĐSTVO I ČLANOVI LITERARNO – NOVINARSKJE SEKCIJE